

दिनांक :18.05.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी भारत और नॉर्वे ने बातचीत रे ज़रिए शांति री कोशिशों री हिमायत करण वाळा बताया ।
- केन्द्रीय वाणिज्य मंत्री पीयूष गोयल कह्यो-भारत रा सामान री दिसावर मांय बिक्री 863 अरब डॉलर ताई पूगी ।
- राज्य मांय जबरदस्त गर्मी रो दौर-आयुष मंत्रालय हेल्थ एडवाइजरी जारी कीनी ।

अर

- विश्व संग्रहालय दिवस रे मौके आज प्रदेशभर मांय न्यारा-न्यारा कार्यक्रम राखी ज्या ।

000

प्रधानमंत्री नरेन्द्र मोदी कह्यो है के भारत अर नॉर्वे हमेशा बातचीत अर कूटनीति रे ज़रिए शांति री कोशिशों री हिमायत कीनी है । श्री मोदी आज नॉर्वे रा प्रधानमंत्री जोनस गाहर स्टोरे सागे खबरनवीसां सागे बातचीत कर रह्या हा । दोन्यू देशों री ओर ऊँ जारी भेळा प्रेस बयान मांय कही ज्यो के यूक्रेन अर आतूणी एशिया समेत दुनिया रा न्यारा-न्यारा हलका मांय चाल रह्या झगड़ा-टन्टां बीचे फौजी कार्रवाई किण ई समस्या रो हल नी है ।

बातचीत रे दौरान दोन्यू देशों बीचे पर्यावरण अर साफ ऊर्जा हलका मांय ग्रीन स्ट्रेटेजिक भागीदारी ने आगे बधावण माथे ई सहमति बणी । ई रा तैत अंतरिक्ष हलका मांय मदद सारू इसरो अर नॉर्वे स्पेस एजेंसी बीचे एक करार माथे ई सही करी ज्यी ।

000

केन्द्रीय वाणिज्य अर उद्योग मंत्री पीयूष गोयल कह्यो है के दुनिया री चुनौतियां रे बावजूद भारत री माली व्यवस्था अर दिसावार मांय बिक्री लगातार बध रही है । वे आज नई दिल्ली मांय "भारत व्यापार महोत्सव" री वेबसाइट री सरुआत करण रे मौके राखी ज्या कार्यक्रम मांय बोल रह्या हा । श्री गोयल कह्यो के ई साल भारत रा सामान री दिसावर मांय बिक्री 863 अरब डॉलर रा लेवल ताई पूग गयी, जो लारला साल री तुलना मांय करीब पांच फीसदी बत्ती है । केन्द्रीय वाणिज्य मंत्री कह्यो के चालू माली साल सारू भारत दिसावर मांय बिक्री एक ट्रिलियन डॉलर रा लेवल ताई पूगावणो तैय कीनो है । श्री गोयल देश रा कारोबारी समुदाय रे साल 2047 ताई विकसित भारत बणावण रो लक्ष्य हासिल करण सारू पूरी मजबूती ऊँ आगे बधबा रो भरोसो जतायो ।

000

कोटा रा जे.के. लोन अस्पताल मांय लारला दिनां जापा वाळी लुगाइयां री तबियत खराब व्हेवण अर मौत व्हे जावण रा मामला मांय चिकित्सा अर स्वास्थ्य मंत्री गजेंद्र सिंह खीवसर सरुआती तौर ऊँ ईलाज रा काम मांय आवण वाळा साज-ओ-सामान मांय संक्रमण या दवाइयां मांय गड़बड़ी री शंका जतायी है ।

श्री खींवर आज जयपुर मांय खबरनवीसां सागे बातचीत करता थकां कह्यो के ईलाज रा काम मांय आवण वाळा शंका वाळा साज-ओ-सामान अर दवाइयां रा नमूना जांच सारू भेजी ज्या है, ज्यां री रपट 23 मई तांई आवण री आस है। वे कह्यो के एम्स री टीम ई अस्पताल रो दौरा कर र मामला री जाणकारी लीनी है अर रपट आयां पाछे जरूरी कार्यवाही करी जावेला।

000

राज्यपाल हरिभाऊ बागडे आज विधानसभा परिसर मांय राजस्थान विधानसभा रा 75वां साल रा सिलसिला मांय विधानसभा रा नुवा प्रतीक चिह्न रो विमोचन कीनो। ई मौके वे कह्यो के ओ प्रतीक चिह्न राजस्थान री जनता री सोच बतावे है। राज्यपाल कह्यो के ई प्रतीक चिह्न मांय राज्य पुष्प रोहिड़ा, खेजड़ी रा रुंखड़ा अर विधानसभा भवन रा फोटो शामिल करी ज्या है, जो प्रदेश री संस्कृति रो दरसाव करे है। ई मौके विधानसभा अध्यक्ष वासुदेव देवनानी बतायो के आज विधानसभा रा चार ई ऐतिहासिक दरुजां रा राजस्थानी संस्कृति रे मुजब राख्यी ज्या नुवा नाम री पट्टियां रो ई अनावरण करी ज्यो।

000

केंद्रीय अन्वेषण ब्यूरो-सीबीआई नीट पेपर लीक मामला मांय लारला 24 घंटां मांय पांच ठौड़ां छापा मार र केई खास कागजात, कंप्यूटर अर मोबाइल फोन जब्त कीना। जांच मांय परीक्षा ऊँ पैली लीक व्ह्या केमिस्ट्री अर बायोलॉजी रा पेपर लीक व्हेवण रा मूल स्रोत री ई ठा पड़ ग्यी है। एजेंसी महाराष्ट्र रा लातूर ऊँ एक और कोचिंग क्लास रा निदेशक ने गिरफ्तार कीनो है। ई मामला मांय हाल तांई जयपुर दिल्ली अर लातूर समेत देश रा न्यारा-न्यारा हलकां ऊँ दस आरोपितां ने पकड़ी ज्या है। ध्यानजोग है के ई महीना री तीन तारीख ने व्ही आ परीक्षा पेपर लीक री शंका पाछे रद्द कर दीरीजी ही।

000

राज्य मांय पड़ रही जबरदस्त गर्मी बीचे मौसम विभाग 19 जिलां मांय आज अर काल लू बाजण सारू चेतायो है। ई बीचे चित्तौड़गढ़ अर पिलानी मांय 46 दशमलव 2 डिग्री सेल्सियस अधिकतम तापमान दर्ज करी ज्यो। मौसम विज्ञान केन्द्र जयपुर रा निदेशक राधेश्याम शर्मा बतायो के आवता एक सप्ताह तांई प्रदेश रा घणखर हलकां मांय गर्मी रो कोप रहवेला। वे बतायो के ई दौरान सरहदी हलकां अर लंकाऊ-ऊगणी हलकां मांय कठे-कठे लू बाजण री शंका है।

ई बीचे आयुष मंत्रालय ज़ोरदार गर्मी अर लू रा कोप ने ध्यान राखता थकां आज हेल्थ एडवाइजरी जारी कीनी है। इण मांय बच्चां, बुजुर्गां, आस वाळी लुगाइयां अर खुला मांय काम करण वाळा मजूरां ने खास तौर ऊँ सावचेती राखण सारू कही ज्यो है। एडवाइजरी मांय चक्कर आवण, माथा मांय ज़ोरदार दर्द अर बेहोशी व्हेवण री सूरत मांय तुरत 108 या 102 हेल्पलाइन माथे संपर्क करण री राय दीरीजी है। ई सागे ई लू ऊँ बचाव सारू बराबर पाणी पीवण अर तावड़ा ऊँ बचबा री राय दीरीजी है। ई सागे ई शरीर ने ठंडो राखण सारू छाछ, नारियल रो पाणी, नींबू री शिकंजी, तरबूज अर खीरा सरीखी चीजां काम लेवण बाबत् ई कही ज्यो है।

000

आज विश्व संग्रहालय दिवस मणायी ज्यो। ई मौके प्रदेशभर रा सरकारी संग्रहालयां अर स्मारकां मांय न्यारा-न्यारा कार्यक्रम राख्यी ज्या। जयपुर अर अजमेर समेत न्यारी-न्यारी ठौड़ां सैलाणियां रो तिलक लगा र अर फूलां री बारिश कर र स्वागत करी ज्यो। ई मौके देशी-परदेशी सैलाणियां अर जनता ने सगळा संग्रहालयां अर स्मारकां मांय मुफ्त प्रवेश दियो ज्यो।

ई मौके उपमुख्यमंत्री दिया कुमारी जयपुर जयपुर रा अल्बर्ट हॉल म्यूजियम मांय लगायी ज्यी प्रदर्शनी ने निरखी। ई मौके दिया कुमारी कह्यो के संग्रहालयां मांय नुवा सुबीता मुहैया करा र सैर-सपाटा ने बधावो दियो जा सके है। वे कह्यो के राज्य सरकार सांस्कृतिक विरासत न बचावण अर सैर-सपाटा ने बधावो देवण सारू लगातार काम कर रही है।

जैसलमेर रा दी थार हेरिटेज म्यूजियम अर पाली रा सरकारी बांगड़ म्यूजियम मांय सांस्कृतिक धरोहरां ने बचावण रा मुद्दा माथे विचार गोष्ठियां राख्थी ज्यी ।

000

मुख्यमंत्री भजनलाल शर्मा आज जयपुर मांय वां रा रहवास माथे जनसुणवाई कीनी । वे जनता री समस्यावां सुण र केई परेशानियां रो मौके ई निपटारो करायो । ई मौके मुख्यमंत्री कह्यो के सरकार समाज रा हर एक पात्र जणा तांई सरकारी योजनावां रो फायदो पूगावणो तैय कीनो है ।

000

इन्दिरा गांधी नहर परियोजना ऊँ जुड़ी नहरां मांय डोढ महीना पाछे आज 10 हजार 800 क्यूसेक पाणी छोड़ी ज्यो, जो आवता 48 घंटा मांय नहर रा आखिरी हलका तांई पूग जावेला । इण ऊँ सूरतगढ़, रावला, घड़साना अर अनूपगढ़ हलका रा किसानां ने साखां री बुवाई सारू पाणी मिल सकेला । सिंचाई विभाग रे मुजब 1 अप्रैल ऊँ लागू करी ज्यी नहरबंदी रे दौरान नहर री सिल्ट सफाई, टूटी पटड़ियां री मरम्मत, रेगुलेटरां रा रख-रखाव अर दूजा जरूरी काम करी ज्यो । दूजी कानी नागौर अर डीडवाना-कूचामन जिला मांय नहरबंदी रो आखिरी दौर चाल रह्यो है, जो एक सप्ताह तांई चालेला ।

000